


Alkitab Buat Bocah Nampilin



Raja nyeng
Bae, Raja
nyeng Jahat



Nyeng nulis: Edward Hughes

Nyeng bikin gambar: Lazarus
Alastair Paterson

Nyeng nyocokin: Ruth Klassen

Nyeng terjemahin: Matheus Nalih Ungin

Dibikin buat: Bible for Children
www.M1914.org

©2023 Bible for Children, Inc.

Perijinan: Enté boleh ngegandain atau nyetak ini cerita,
selama enté kagak ngejualnya.




Bisa jadi ini ari nyeng
sedih buat Manasye.
Bapanya, Raja Hizkia baru
aja mati. Sekarang, mesti
baru umurnya dua belas
taun, Manasye kudu jadi
raja atas jamaah Tuhan di
Yehuda. Dia kaga tau
seterusnya, tapi Manasye
bakal jadi raja buat lima
puluh lima taun. Manasye
butuh bantuan Tuhan
buat jadi raja nyeng
bener.




Tapi Manasye nolak Tuhan, dan ngelakuin hal nyeng jahat. Manasye ngebangun altar penyembahan berhala. Ia bikin patung dan ditaro di rumah Tuhan nyeng Kudus! Tuhan udah berkata kepada Musa,

"Jangan ngebikin buatmu patung-patung.


Jangan sedeku nyembah kepadanya atawa sembahyang kepadanya."



Manasye praktekin ramalan ama ilmu sihir. Dia nyeng mimpin rakyatnya buat ngejauhin Tuhan. Sang raja juga ngebakar anak lakinya jadi korban buat berhala. Kaga nurutnya Manasye bikin Tuhan marah banget.



Waktu umatNya kaga nurut, Tuhan ngijinin mereka supaya dihukum. Itu juga terjadi sama Manasye ama orang-orang nyeng diperentahnya. Tuhan ngebawa tentara Asyur buat nyerang mereka. Manasye dirante dan dibawa ke Babel.




Ngerasain kesengsaraan di Babel, Manasye ngerendahin diri pada Tuhan, Allahnya. Dia bener-bener ngerendahin diri di depan Allah nene moyangnya dan sembahyang kepadaNya. Kaga ada lagi penyembahan pada berhala nyeng mati. Tapi apa iya Tuhan nyeng idup ngejawab sembahyangnya Manasye abis semua kejahatan nyeng udah dia kerjain?



Iya! Tuhan ngedenger
sembahyang raja itu dan
ngebawanya balik ke
Yerusalem, dan ngembaliin
kedudukannya jadi raja.
Manasye ngakuin kalo
Tuhan itu Allah.



Raja Manasye jadi orang nyeng baru. Dia ngeluarin semua patung dari rumah Tuhan dan ngejauhin allah-allah asing ama berhala dari Yerusalem. Dia ngebuangnya ke luar kota. Lantas dia nyuruh rakyatnya buat ngelayanin Tuhan Allah Israel. Berubah banget Manasye!




Seudahnya Manasye mati, anaknya dewek, Amon, balik lagi nyembah berhala-berhala. Tapi dia kaga mao ngerendahin diri sama Tuhan kaya Manasye. Malah Amon ngelakuin dosa nyeng lebih banyak lagi, ujung-ujungnya pegawe-pegawenya ngebunuh dia di rumahnya dewek. Dia cuman bisa merentah dua taun.



Raja nyeng berikutnya, Yosia umurnya baru delapan taun. Dia merentah lamanya 31 taun dan ngerjain apa nyeng bener diliat Tuhan. Dia ngancurin semua sesembahan palsu ama semua allah-allah palsu. Seutuhnya Yosia ngeremukin ama ngancurin semua patung itu jadi abu.



Raja Yosia nyeng bae juga ngebersihin ama ngebetulin Rumah Tuhan. Disela-sela tumpukan sampah seorang pastur nemu Kitab Taurat Tuhan nyeng dikasih lewat Musa.



Waktu sang raja
ngedenger hukum
Taurat itu, di robek
pakeannya. Yosia tau
jahat luar biasa nene
moyangnya dalem kaga
nurutnya mereka sama
hukum Allah.



Seorang nabi perempuan nyeng namanya Hulda nyampein pesen Tuhan sama Yosia. "Kaya gini Firman Tuhan itu: Sebenarnya Aku bakal ngedatengin bencana buat tempat ini dan ama penduduknya ialah segala kutuk buat tempat ini, karena mereka udah ninggalin Aku." Tapi karena Yosia udah ngerendahin diri ama nurut,


kutuk ini kaga bakal ada sampe dia mati.



Tuhan nulungin Yosia buat mimpin orang-orangnya biar pada balik sama Tuhan. Satu ari, pas dia lagi mimpin jamaahnya dalem peperangan, tukang-tukang panah ngelukain Yosia sampe parah.

Orang-orangnya ngangkut dia pake kreta cadangan ke Yerusalem dan di sono dia mati. Seluruh Yehuda ama Yerusalem pada bekabung sebab matinya dia, dan bikin nyanyian nyeng sedih tentang Raja Yosia nyeng bae.





Secepatnya, kerajaan itu bakalan kelar. Tapi satu ari, seorang raja bakalan merentah lagi atas Israel. NamaNya RAJA DIATAS SEMUA RAJA, DAN TUHAN DIATAS SEMUA TUHAN. Pas Yesus Kristus dateng pertama kali, Dia kaga diterima ama disalib. Pas Yesus Kristus dateng lagi, Dia kaga cuman bakal jadi Raja buat Israel, tapi buat semua bumi.



Raja nyeng Bae, Raja nyeng Jahat

Sebuah cerita dari perkataannya Tuhan, Alkitab

Ditemuin di

2 Tawarikh 33-36

"Palang pintu Firman Engkau ngasih terang."
Mazmur 119:130



Tamat



Ini cerita Alkitab nyeng nyeritain kita soal Tuhan kita nyeng keren, nyeng nyiptain kita ama pengen enté kenal Dia. Tuhan tau kita udah bikin hal-hal nyeng kaga bae, nyeng Dia sebut dosa. Hukuman dosa ya mati, tapi Tuhan sayang banget sama enté, Dia ngirim anaknya nyeng atu-atunya, Yesus, biar mati disalib dan dihukum karna dosa enté semua. Lantas Yesus idup dan balik lagi ke rumahnya ke Sorga. Kalo emang enté yakin ama Yesus dan minta biar Di maafin dosa-dosa enté, Dia bakalan ngelakuinnya! Dia bakalan dateng dan idup di dalem enté ini ari, dan enté bakalan idup ama Dia selamanya.

Kalo enté yakin ini kebenerannya, sautin ini ke Tuhan: Ya Yesus, ané percaya kalo Engkau itu Tuhan, dan berubah jadi manusia buat mati karna dosa ané, dan sekarang Engkau idup lagi. Tulung dateng kedalem idup ané sama maafin dosa-dosa ané, biar ané punya idup nyeng baru ini ari, dan entar bakalan pegih sama Engkau selamanya. Tulungin ané biar bisa nurutin Engkau dan idup buat Engkau ama anak Engkau. Amin.

Bacain Alkitab dan ngomong ke Tuhan tiap ari! Yohanes 3:16

